

Ti xroon chr'éhen Pablo

Tito

Pablo nixjehe ch'in Tito

1 ¹Janhan Pablo t'ahā ixra Díos la ko Jesucristo kixin tsjákohá iso ti sin tsíkjeýá Díos kixin ts'itja sin nkexrín chrókuinkáchónki sin ti nkehe chaxín. ²La tjejóchóhen sin tsochónta sin ti kjuachón nkochrín. Díos la xitjahya sich'ia ch'an la kaín tíhi tsíchronka ch'an ósé ti naxa k'ónahña chjasintajni. ³Ndá ti ñao tsíchronka Díos la ijie ó xiteyá, ndá kónoxín ti itan kuènté ch'an. La Díos ti nkexro tsaáxini mé k'uetóan kixin sít'ahā ch'an ixra tsjákuwa ti itén ch'an. ⁴*Ikjian ti xroon i chr'ahán jaha Tito. T'íkuan éxi chaxín xjana kixin yóini tinkáchónkini Jesús. It'éni Díos la ko Jesucristo ti nkexro tsaáxini, chrókjuintañaaoan la ko chrókjuajon ch'an ti kjuaxróxin kuènté ch'an kixin tjuaha ch'an.

Ti ixra sich'e ti ch'in Tito

⁵Ti ó kuítóhā ti isla Creta la kixin chrókuétuehén ti sin tjejó

ntiha kixin nkexrín chrókóhen kaín ti ixra naxa t'itjáña tsohen, la ko chrókjuéýá ti nkexro ts'etóan nkojnko nínko nkojnko chjasin éxi kuétuahan. ⁶*Ti nkexro ts'etóan ijnko nínko la jína chrókjuák'e kixin ninkexró chrók'uekahya ijie, nkokoa ichjién chróchónta, chrókuinkáchónki ñnchéni ti xjeen sin kixin kohya nkexro chróndáchro kixin jehya jína tjejóch'e sin la ko titekakhñña sin. ⁷Mé xíkaha ti nkexro ts'etóan nínko la tsonoh nkexrín tsohen ixra kuènté Díos, la ticháxin ijnko nkexro tsjenkayáxin jína, tjasinhña ijie, chrókjuinchenkehya, chrókónínkakakhñña tjoka la ko jehya ijnko nkexro tókoan, o ijnko nkexro tjeýá kjuanínkaon o chrókóxríenhña chrókjuich'ia kixin antsí chrókjuacha chichaon. ⁸Jína chrók'uáyéhe nkojín ti nkexro tsjiji ndoe la chrókjuajon kjuachaxin chrókjuák'e ti nkexro a, la ko jína chrókjuak'e,

jína chrókjuénkayáxin, kixin Díos ó tsíkjinchetjóá ti jehe ch'an la ko chrókjuacha ch'an chrók'uetuehen asén ch'an. ⁹La ko chrókuítóehya ch'an ti itan jína xrákohe ch'an kixin jína tsjakohe ch'an iso chojni ti nkehe ndoá, la kjónté ti nkexro tjinkakonhña tsihin, la jína chrókuihin sin.

¹⁰Kixin sín itsjé ti sin judío nínkaon, la nixja sin nkehe nduáhya la xikaha ch'iyehé sin chojni. ¹¹Ti sin a la ticháxin chrókjuinchetánini sin kixin tjachróé sin itsjé chojni kixin tjako sin ti nkehe nduáhya la xikaha tjacha sin nchónhña chichaon.

¹²Ijnko nkexro kjuák'e chjasin Creta mé tsíchronka nkexrín tjejó ti sin chjasén sin. Ndáchro: "Kaín ti chojni chjaséni mé imá ch'ia sin, imá jiehe sin, imá kóchjinka sin la ko séhe sin." ¹³Ti nkehe tsíchronka ch'an la chaxín ndoá. Méxra antsí chrónixjehé sin kixin jína chrók'uejó sin chrórxaxinkaon sin Díos.

¹⁴Nixjehé sin kixin chrókuahya sin kuentá kaín ti nkehe tsík'axrjeníxin ikja ti sin judío tjako, la ko chrókuitekakonhña sin ti nkehe t'etqan ti sin nínkakohen ti nkehe chaxín.

¹⁵Ti nkexro chaxín tjóá la kaín ti nkehe ich'e sin la jína. Andá ti nkexro titekakonhña la kohya ninkehó nkehe jína ti kjuaxrexinkaon kuènté sin, la kaín nkehe tjenkayáxin sin mé

tjuáhya. ¹⁶Ndáchro sin kixin chóxin sin Díos, kjánchó t'ikoni nkexrín ich'e sin ndá noheni kixin chaxínhña, jehe sin la ch'ia sin. Ich'e sin nkehe jínahña, jiehe sin la ko titekakonhña sin. Méxra xrokjuahya ich'e sin ninkehó ixra jína.

Chrokjuako Tito ti itan chaxín

2 ¹Kjánchó jaha la chrókjuakua ti itan chaxín jína. ²Tjákohé ti sin ó táda kixin chrókókoanhña sin, jína chrók'uejó sin, chróchónta sin kjuasáye sin, la chróchónta sin ijnko kjuaxrexinkaon jína, chrókuitekaon sin ti nkehe chaxín, chrótjuehé kícho sin la ko chrókónínkakonhña sin tjoka. ³Kjaxin ti sin nána la jína chrók'uejó sin, chrókuinkáchónkihya sin kjuach'ia la ko chrókókoanhña sin. Ícha jína chrókjuakoxin sin ijnko nkehe jína ⁴kixin xikaha chrókjuakohe sin ti sin tjarisoá kixin chrótjuehé sin xii sin la ko xjeen sin, ⁵la chrókjuích'e sin xra jína, ndoá chrókjuénkayáxin sin, la jína chrók'uayakohen sin ndoe sin, chrókójina sin la ko chrókuitekakohen sin ti xii sin. Ndá xikaha tsokohya nkexro ts'ándaxínhin ti itén Díos tinkáchónkini.

⁶Kjaxin chrókjuakohé ti sin ndasoá kixin chróchónta sin kjuasáye sin. ⁷Jaha chrókjuakohé sin kaín ti nkehe jína la ko ndoá chrók'uejó sin. ⁸Chrónixja ti

nkehe jína kixin kohya nkexro chrók'uándaxíhan, la xíkaha chrókósuéhe ti sin nínkaon, la chróndáchehya sin nkehe jínahña ti jeheni.

⁹Tétuehén ti sin ch'exón ixra kixin chrókjuinchexiteyéhe sin ti làmoé sin, la chrókójína sin la chrónixjankíhya^a sin, ¹⁰chrókueéhya sin. Ndá xíkaha chrókjuakoxin sin kixin náxrjón ti itén Díos tsaáxini.

¹¹Kixin Díos kjuakoxin nkexrín imá tjuéhe ch'an ti jeheni la kjuajon ch'an ti kjuachón kixin jehe ch'an mé tsaáxin kaín chojni. ¹²Tjakohe ch'an ti jeheni nkexrín chrókuítòhèni ti ijie la ko kaín ti nkehe nduáhya tjenkayáxini. La jína chrók'uejóni la ko antsí chrókjuikosáyeheni Díos. ¹³Kjaxin chrókóchéhèni chrók'uejóchóhèni ti ñao itsi Jesucristo, ti Díos kuènténi la ko ti nkexro tsaáxini, tsjikao ti kjuachaxin ijíe. ¹⁴*Jehe ch'an mé k'uenyákohèn ch'an ti jeheni kixin tsaáxini ch'an kixin tsotjuáxin kaín ti ijie chóntani kixin ts'ónani ijnko chjasin kuenté ch'an la ko tsòxrhini sich'eni kaín ti ixra jína tjinkaon ch'an.

¹⁵Tíhi mé chrókjuàkua la chrókjuinchexraxinkaoan sin la ko chrókuétuehén sin kjuachaxién Díos. Chrokuítóéhya kixin ninkexró chrókjuanoá ti nkehe tjàkua.

Jína chrók'uejò ti sin tinkáchónki Cristo

3 ¹Chrokjuinchexraxinkaoan sin kixin sinchexiteyéhe sin ti gobierno la ko ti sin t'etòan la chrókjuích'e sin ti ixra ts'etòan ti sin a la ko chrókjuích'e sin kaín ti ixra jína ²La ko chrók'uándaxiéhña sin ninkexró, la kjuaxróxin chrók'uejò sin, la chrók'óna sin ijnko chojni jína la ko chrókjuikosáyehèni sin kaín chojni.

³Ósé la kjaxini kuélontini la ko k'uekitekakonhñani Díos. Chjiñé kuék'ajini la k'uekóxríhini kaín nkehe jínahña, la nduáhya kuék'ejóni la k'uechóntani kjuachjinoxíhin la ko k'uekóninkakohèni kíchóni.

⁴Andá ti Díos tsaáxini mé kjuakoxin kixin jína ch'an la ko tjuéhe ch'an kaín chojni. ⁵Jeheni kuaáxini ch'an, la jehya kixin ichrén ixra jína chrókjuích'e. Náhi. Jehí kuikonoéhe ch'an ti jeheni ndá kjuínchekaá ch'an ti jeheni la ko kjuínchetjóá ch'an ti jeheni. Ndá kokjíhi nixiéni kixin ti Nchakuén ch'an mé k'uáyèxini ti kjuachón nixin. ⁶Kjuasáye Jesucristo, ti nkexro tsaáxini, ndá Díos kjuínchekitonhen ti jeheni ti Nchakuén ch'an kixin tsochóntani kjuachaxin. ⁷Kixin imá tjuéhe ch'an ti jeheni la kjuínchetjóá ch'an ti jeheni ndá ijie tjejóchóhèni ti kjuachón nkochríxín tsjajon ch'an.

^a 2:9 *chrónixjankíhya* *tjatènkíhi* sin respondones

2:14 a: Sal. 130:8; b: Ex. 19:5; Dt. 4:20; 7:6; 14:2; 1Pe. 2:9.

⁸Kaín tíhi mé chaxín.

Tjínkaon kixin chrókuétoan kaín tíhi kixin ti sin tinkáchónki Díos mé chrókjuích'e sin ti ixra jína. Kaín ti nkehe la mé jína la ko tsjinkĩsa kaín chojni.

⁹Kjánchó jaha chrókjiatéhya ti kjualontĩ itjo sin, la ko tahya kuentá ti nkehe tinkáchónki ti sin tsík'axrjeníxin sin la ko ti sin tjajonxin ti ley kuénté Moisés. Kaín tíha la ó chónkó la ninkehó kjuaxrexinkaon jína chóntahya.

¹⁰Andá ti nkojín nkexro tjinkaon tsjixrónkáxin ti ninko, la sao nixjehé sin nkojína la ti ó yaáxin, ndá ti tsitekakonhña sin ndá titohé sin sátsji sin ¹¹kixin ó noha kixin ti nkexro xikaha ich'e la nduáhya tjenkayáxin kixin la ó kjuasin ijie la tíha tsjasótexín.

Ti nkehe k'ueñoan Pablo

¹²*Ti ó tsétuanhan ch'in Artemas o Tíquico tsjiji sin

ti itjen jaha, ndá jaha tjoka chrók'uinkatsjehé ti janhan chjasin Nicópolis kixin ntiha tsjak'é ts'atsínkajia ti nchakuén ikin. ^b ¹³*Jína chrókjuinkĩsa ti ch'in Zenas, ti nkexro nixjayákohe chojni la ko Apolos, la chróchjehé sin ti nkehe tichánxihin sin ti ó sátsji sin kixin ninkehó nkehe chrók'uitjáñankíhya ti ó sátsji sin. ¹⁴Ndá ti íso sin la chrók'uitja sin nkexrín sich'e sin ti ixra jína la ko chrókjuinkĩsa sin ti nkexro ticháxihin ichrén nkehe ndá chrókjuakoxin sin kixin jína tjejó sin.

Kjuixixín nixja Pablo

¹⁵Kaín ti nkexro tjejókian ntihi nixjaha sin nkojína. Jaha nixjehé kaín ti sin tinkáchónki ñchéní tjejó ntiha, kaín ti sin imá tjeñeni. Díos mé sintañaora kaínra. Ó tjen.

^b 3:12 *nchakuén ikin* ti nitjó imá ikin invierno

3:12: Hch. 20:4; Ef. 6:21, 22; Col. 4:7, 8; 2Ti. 4:12. 3:13: Hch. 18:24; 1Co. 16:12.